

Վերափոխումն Սուրբ Աստածածնի: Այդ օրը մատաղ են անում և բաժանում ժողովրդին, իսկ եկեղեցում խաղող օրհնում:

### ԶԳԵՍՏ ԵՒ ԶԱՐԿ

Փէրիայում թէ տղամարդի և թէ կնոջ տարազը շատ հասարակ է և աղքատ: Տղամարդիկ հագնում են պարսիկ գիւղացու տարազով, իսկ կանայք՝ Հայաստանի գիւղերից բերած հին տարազով են: Սպիտակ կտորներ համարեա չեն հագնում, իսկ փոխնորդ մէկից աւելի չունեն: Այժմ այստեղ առաջ եմ բերում նրանց նկարագիրը:

### ՏՂԱՄԱՐԴԿԱՆՑ ՏԱՐԱԶԸ

Շապիկ: Տղամարդի շապիկը հասնում է մինչև ազդրը. ծնկներից մի քիչ վերև. կարում են՝ աղքատները կտաւից, իսկ հարուստները մթխալից. կուրծքը բաց չէ, կոճկում է մի կոճակով աջ ուսի վրայից. թևերը լայն են և երկար, կարած է մինչև արմուկը, ապա բաց է, և կոճկում է 5—6 կոճակով դաստակի վրայից. գործելու ժամանակ գիւղացին այդ մասը վեր է ծալում, որ շապիկ թևերը չը խանգարեն գործին. լւանում են ամիսը մի անգամ: Աւենն միայն մի փոխնորդ, իսկ փոքր ինչ չքաւորները դրանից էլ զուրկ են:

Վարսիկ (քմբան): Սա կէս գագ լայնութիւն ունի և հասնում է մինչև ոտաթաթը. կարում են՝ աղքատները կտաւից, իսկ հարուստները մթխալից. վերևից ոլորած պարան (խօնջան) են անցկացնում և կապում առջևից. լւանում են երկու ամիսը մի անգամ:

Արխալուղ: Հագնում են շապիկ վրայից, որ հասնում է մինչև ծնկները. կարում են՝ աղքատները կտաւից և շամից. իսկ հարուստները չթից. թևերը լայն են և կարած է մինչև արմուկը, իսկ նրանից ցած՝ բազուկի վրայից կոճկում է 5 կոճակով:

Կապա: Հագնում են արխալուղի վրայից. սա հասնում է